

ANIMAZION

Co sarè l'istà di bec?

Aon fat l pont de la situazion con Thomas Zulian, Lisa Brunel e Claudia Marchetti

Jà te la setemènes passèdes aon rejonà di problemes de la sociazions che laora coi bec sporjan atività via per l'istà. Aon domanà fora la situazion de Istà Algegra e chesta setemèna enveze seron l cerchie coi responsaboi de Inout, Marijene e Istà per bec de la Val de Sora.

**Inout se enjigna a tor ite 191
bec e joegn**

»Dut chel che vegnarà tout sù servirà per poder ge sporjer ai bec valch de

più che le classiche atività senza cost, per ge dar valch oportunità fora de anter ai bec», chesta la rejon che à spent Inout a domanèr l didament economic de la comunanza te l'an del Covid che à metù en jeneie n muion de sociazions che se empegna tel setor de l'animazion.

Cosé smaoré te l'endrez de la ativitèdes e te l'assunzion de personal per ge stèr dò a duta la normative contra l virus, já senestres da respetèr con duc i limic che les se tol dò.

»Vegnarà privilegià le atività de fora, raide sa mont o con la roda tel bosch – ne à dit l president de la coprativa sozièla Thomas Zulian – cognaron lurar con picoi gropes, donca con programes desvalives de grop en grop a na vida che se posse tegnir l distanziamet sozjal, dapodò speron che le restrizion le doente man a man più lijiere. De segur faron sport e i laboratories coi esperc e, a na vida che duc i posse saer ence chel che fasc i autres, endrezaron pareaes e contegnui online coscita



L'animazion cognarà esser fata a picoi gropes e più che auter a l'averta.

da tegnir l spirit de grop ence se ge vel far atività despartide».

Istà per bec, manco partezipanc?

Desche per duc, ence per »Istà per bec« l binomie Covid-protocoi l'è stat n gran problem, coscita ne à contà la responsabola Claudia Marchetti: »La linies vida les é ruèdes tardives e zacan on podù scomenzèr a se mever: on cognù se spartir te doi lesc, al Kinderland e te scola populèra, fèr doi turni per la mensa, tor più pulmins e sessaben più maestres. A desferenza di etres egn, cognaron fèr duta la ativitèdes a picoi gropes e chest danejarà l spirit de grop e de dividijon che l'era la basa de nosc esser... tinultima, e ge l'on dit ence a la Provinzia, i ne fèsc spartir bec che dapodò i se veit istesc al parch, al bar, te cèsa a magnèr ensema: te val i bec e la amicizies l'è cheles, no se sciampa».

Istà per bec à ence cognù a vèlch vida sbassèr l numer di partezipanc: »L'on cognù fèr mèl bolintiera, já coscita cognon esser 13 maestres e, se assane tout sù duc i 118 bec, assane cognù ruèr a 16«. Istà per bec à donca cernù per endèna de no azetèr la domanes ruèdes tardives e cheles di bec fora provinzia, apede a vèlch domana che é stata touda de retorn da la families dò aer vedù la linies vida. La speranza del grop resta aboncont chela de n cambiament di protocoi tel raport bec-animatores o del didament de autres 3 animatores, per poder smaorèr l numer di enscinuè e tor ite duc, n mudament che já te chisc dis podessa ruèr: apontin ades che jon en stampa, pareaes che sie la possibilità de jontèr i 3 animatores nezessères per lurèr con duc i bec.

Resta ence problemes economic: »Con duta la manifestazions che sauta chest istà l'è la possibilità de

sparagnèr vèlch da chel vers e de investir su chest projet. Canche é sapù la linies vida siere enirèda, demoralisèda, senza paroles perché i ne à dassen taà la giames.

Nos aon na gran fortuna a esser leé al comun, l ne dèsc n gran, gran didament».

**Marijene, spartijon di gropes e
enscinuazions dantfora**

Na perferida desvaliva l'è chela che sporc Marijene, autra sociazion de animazion che laora ti desferenc comuns fascegn. »Al scomenz l'è stat n muie senester – ne à dit la presidenta Lisa Brunel – de solit scomenzaane a endrezar já de marz e chest an no saane niente amò se assane podù far animazion.« Dò i cruzies l'è ruà zacan la linies vida e coscita ence Marijene à podù se endrezèr, con gran lurier dessema ai Comitac: »No podaron tor ite più che 12 bec per atività, ajache sion doi animatores per paisc e i bec i cognarà se enscinuar la sera inant. Se dapodò no vegnarà arjont l numer mascim de bec con le iscrizion, i podarà se jontar ite ence l di do. Sarà fat doi gropes, con un animator e 6 bec, che no i podarà per nesciuna rajon se mescedar».

La linies vida limita l numer de bec ma ence la lèrga. L post olache se de jouc la ativitèdes l cognarà esser defat delimità e a desposizion demò del grop e no vegnarà fat ativitèdes daite. Per chel che vèrda i cosé, no sarà na gran variazion respet ai egn passé: »Aon semper abù doi animatores per paisc. Sarà valch speisa de più per chel che varda i materiai, perché spartir te doi gropes n'atività vel dir dopiar l material. Dapodò sarà valch speisa per i prodoc de sanificazion, acioche dut vegne fat en segurezza».

Daniele Verra